

HEVDEM

KURD Û VALÊNTAYIN

*Evîn Tahir
Hirofî*



Evîn hesteka nazik û paqij e ku di derûnê her mirovekî de heye û her çende têgehê viyanê ji mirovekê bo mirovekê dîtir cudaye, lê giring eve ye ku di binyat de çu mirov neşên viyanê nekin belku mirov çî nêr çî mê pêdivî bi kesê duyê heye da ku di gel êk berdewamiyê bidin jiyaneke xweş û viyan ciwantirîn rêk e bo gehiştina vê meremê, lewa fere ku mirov pişkeka mezin ji jiyana xwe bo viyana xwe û xelkê dîtir terxan bike, eger ne be jiyana wê bibe biyabaneke hişîk, û peywendiyên xêzanî û civakî dê ber bi lawaziyê çin û di encam de dahênan nahê kirin.

Bi xwe viyan di nav hemû civ-



akan de heye û ne merc e bi tinê di navbera kur û keçan de hebe, belku dinavbera hemû mirovan de heye û bêgoman yê hez ji kesê beranberî xwe bike, wê hez ji hemû mirovan bike.

Di nav civaka me ya kurdî de, ku êk e ji civakên rojhelaî, ji ber zalbûna dab û nerîtên susiyolojî, viyan qedexe ye û ji berku dê şerefê lekedar bike, lewa jî têgehiştina me bo têgehê viyanê têgehiştinek e pekkevî ye û derzek di nav peywendiyên me de heye û pitiriya xêzanan li ser binyatê evîniyê nahêne danan û bi taybet keçe mafê helbijartina hevjinê xwe nîne û neşet bi aşkirayî derbirîna ji hesta xwe beranber kurekî bike.

Di rojên salê de, hindê cejnên taybet bi hindê helkevta hene ku bo wan kesên jêk dilmayî delîveye, ku bi dîtina êk şad bibin. Êk ji van cejnên pîroz, cejna viyanê ye. Her çende pêdiviyê rojan e viyan hebe, lê gelek caran lez dihê kirin û asteng dikevine di rêka viyanê de, lewa ji bo vê meremê, roja 14î şubatê hatiye nav kirin bi roja viyanê, anku (valêntayîn) ku bi navê qeşeyekê Romanî ye ku (270) salan berî zayîna romanî ya êmpiratorek hebûye bi navê (Kiladiyos) ku biriyar da bû nabe serbaz jinê bînin ji berku li dû hizrên wî, jinînan şiyânên zelaî kêm dike, lê Valêntayîn dijî vê hizrê rawestiya û jin bo serbazan dînan û aheng bo digêran, lewma împiratorî biryara girtina wî derêxist û li sêdarê da.

Di demê zîndankirina Valêntayîn de, Valêntayîn hez ji keça pasewanê zîndanê dike. Ku keçik ya korebû, lê demê Valêntayîn înay, çavên wê ronbûn û berî wî li sêdarê bidin, nameyek bo evîndara xwe nivîsîbû û li binê nameyê nivîsîbû Valêntayîn û piştî nameya wî ev roj e hate nav kirin bi Valêntayîn.

Herçende ev roj e li welatên rojava û ji layê Mesîhiyan ve çêbûye, lê ne ya girêdaye bi hîç ayînekî ve, belku bi tinê bo hindê ye ku kesên hez ji hevdu dikin hesta xwe bo êk derbibirin. evca çî bi gotineke ciwan yan jî bi pêşkêşkirina guleka ciwan be û dîsan delîveyeke bo wan hevjinên sisitiyek di nav jiyana wan de heyî, da ku pêdaçûnekê di jiyana xwe de bikin û peywendiyên xwe bi hêz bêxin ji berku viyan û dilxweşî du tiştên pêkve girêdayîne û wekî giyanî ne bo leşê mirovî.

Derbirîna vê helkevte dê peywendiyên civakî xurttir lê bike, herçende hindê Musulmanên hişikbawer dibêjin ku ev helkevteka rojavayî ye û nabe bihête di nav gelên îslamî de û bo nemûne li Pakistan û Hindistan û Îranê hêriş birîne ser çendîn cihên firotina gulên ku gul bi vê helkevte difirotin, lê supas bo civakên rojava ku rojek taybet bo viyanê çêkir, da ku em hizrê di viyanê de bikin, bi tinê eger hizir jî be û rêzê lê bigirin. Ji ber ku her pêngaveka mirov dihavêje, eger hez û viyan di gel de nebe ya serkevî nabe.